

Naqqiut

Naqqiut 10. oktober 2017-imeersoq taarserpaa
(*Allannguutissatut siunnersuummik oqaasertalersueqqinneq*)

Illoqarfinni annerusuni arfineq marluusuni ungasissumiit kiassarnikkut, innaallagissamillu kiassarnikkut ullumikkuminngarnit suli annerusumik atorluanaanerulernissarput siunertaralugu, Naalakkersuisut suliniuteqaqqullugit peqquneqarnissaannik Inatsisartut aaliangiiffigisassaatur siunnersuut. Illoqarfiit pineqartut tassaapput Ilulissat, Qasigiannguut, Aasiaat, Sisimiut, Maniitsoq, Nuuk aamma Qaqortoq.

(Inatsisartunut ilaasortaq Peter Olsen Inuit Ataqatigiit)

Ulloq 1. Januar 2018-imut qitiusumik kiassaateqarfinnut kissarsuuteqarfinnullu il.il. Namminersorlutik Oqartussanit toqqaannangitsumik toqqaannartumilluunniit pigineqartunut tamanut piginnittuunerup, akisussaanerup, ingerlatsinerup aserfallatsaaliinerullu il.il. Nukissiorfinni ataatsimut katersorneqarnissaat pillugu Naalakkersuisut peqquneqarnissaannut Inatsisartut aalajangiiffigisassaattut siunnersuut

(Inatsisartunut ilaasortat, Anders Olsen, Vivian Motzfeldt, Bendt B. Kristiansen, Villy Olsvig aamma Mala Høy Kúko)

Akissuteqaat

(Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoq)

Aappasaanneerinninneq

Aallarniutigalugu Naalakkersuisut siunnersuuteqartut siunnersuuteqarnerannut qutsavigaat.

Soorlu aamma siullermeerinninnermi erseqqissarneqartoq, Naalakkersuisut siunnersuutini marlunni taakkunani siunertarineqartut neriulluarnartorujussuurtut isigaat.

Siunnersuut illoqarfinni anginerusuni 7-ini ungasianiit aamma innaallagiamik kiassarnermi pisinnaasat ullumikkornit atorluarneqarnerunissaannut suliniuteqarnissamut Naalakkersuisut peqquneqarnissaannik tunngasoq, Naalakkersuisut tamakkiisumik taperserpaat. Ungasissumit aamma innaallagissamik kiassarnermi pisinnaasat atorluarneqarnerunissaat nukissiuuteqarnermut immikkoortumut pilersarusiassamut qitiulluinnartutut ilaatinneqarpoq.

Siunnersuut ulloq 1. januar 2018-imut qitiusumik kiassaateqarfinnut kissarsuuteqarfinnullu il.il. Namminersorlutik Oqartussanit toqqaannangitsumik toqqaannartumilluunniit pigineqartunut tamanut piginnittuunerup, akisussaanerup, ingerlatsinerup aserfallatsaaliinerullu il.il. Nukissiorfinni ataatsimut katersorneqarnissaat pillugu Naalakkersuisut peqquneqarnissaannut tunngasup, suliarineqarnissaanut Nukissiorfiit

nunatsinni kiassaateqarfippassuarnut kissarsuuteqarfippassuarnullu takussutissiaagallartumik aammalu qanoq issutsimut nalunaarusiamik suliaqarpoq.

Maannamut takussutissiamiipput kiassaateqarfinit kissarsuuteqarfinnillu 600-t missaannik amerlassuseqartunit 451-it.

Qanoq issutsimut nalunaarusiat Nukissiorfiit suliarisaat aallaavigalugit naliliisoqarpoq pisortat kiassaateqarfiisa kissarsuuteqarfiisalu tamarmik tunniunneqarnerannut aningaasartuutit 168 mio. koruunit missaannik annertussuseqassasut, tassani ilaatinneqarluni Kangerlussuarmi aamma Narsarsuarmi innaallagissamik, kiassarnermik imermillu pilersuinerup tamarmiusup tiguneqarnera.

Kangerlussuarmi aamma Narsarsuarmi kiassaateqarfiit tiguneqarneranni, pilersuiffiusut allat ilanngunneqartariaqaraluarput, tassami kiassarneq innaallagissamillu pilersuineq imminnut atalluinnartussaammata, taamatullu suliaqarfinni taakkunani imermik pilersuinermi sulisoqarneq ilaatinneqarsinnaassalluni.

Kiassaateqarfiit Nukissiorfinnut tunniunneqarnissaannut inaarutaasumik pilersaarummik tunngavissaqalernissamut, maannakkut ingerlatsinermut akisussaasuusut sukumiisumik oqaloqatigineqarnissaat nalilersueqatigineqarnissaallu pisariaqartussaavoq. Pilersaarut tunngavissaq taamaattoq aningaasaqarnikkut sukumiisumik naatsorsuinernek, tunniussinerup sukkassusissaanik aammalu sulisoqarnikkut apeqqutinik il.il. imaqassaaq, aammalu 2019-imut aningaasanut inatsisissatut siunnersuummut ilanngunneqarsinnaassalluni.

Taamaattumik Naalakkersuisut oqaluuserisassani immikkoortumut UKA2017/183-imut allannguutissatut siunnersuut manna saqqummiutissavaat:

”2019-imut aningaasanut inatsimmut siunnersuusiornissap tungaanut kiassaateqarfiit kissarsuuteqarfiillu Namminersorlutik Oqartussanit pigineqartut Nukissiorfinnut tunniunneqarnissaannut siunnersuummik suliaqarnissamik Naalakkersuisut peqquneqassasut. Siunnersuut kiassaateqarfiit tigujartuaarnissaannut piffissamut pilersaarummik, taassumalu ataani sulisoqarnermi kingunerisinnaasanik, kiisalu aningaasalersuinissamut tunngavissanik pisariaqartunik suliaqarnissamut pilersaarummik imaqassaaq”

Naalakkersuisut tamatuma saniatigut inassutigaat oqaluuserisassani immikkoortup UKA2017/47-p ataani siunnersuut akuerineqassasoq.